



Sabtu, 15 Juli 2023
Ogen : Pengerana 11:9-12:1



Pentar Makeken Kinigudan



Melala anak-anak si ngawanken tapi la piga si terus aktif bas kegiatan-kegiatan perpulungen. Kata enda mekatep si begi. Janah kinatana bas gereja pe kata enda payo kap. Si jadi penungkunen ku ja ndia anak-anakta si ngawanken ndube? Renungenta e me kata persinget man anak singuda denga, segelah ermeriah ukur tupung nguda denga, ngelakoken kai sura-sura, la pelepas diri er-arua ate sabap kiningudan labo kap ndekah, tapi ingetlah i bas kerina silakoken e Dibata ngadili kerinana, e maka tupung nguda denga inget Dibata segelah ula sempat reh kiniseran bas wari-wari perpudi.

Masa muda masa meriah-meriah, maun ban riahna lupa orat nggeluh si man dalanenken. I bas si e me kita selaku orang tua arus terus mpersingetisa segelah i bas riahne e pe arus tetap inget Dibata. Dibata ngidah kerina kai silakoken e. Jagalah lagu langkah, dengen tetap rembak ras Dibata.

Masa muda e me masa produktif. Melala kreasi-kreasi si banci ibahan erkiteken imajinasi si lit. *"Jika anda tidak belajar keras saat masa muda, anda akan meratapi kegagalan anda saat tumbuh dewasa"* nina pepatah kalak Cina. Arah si enda kita Moria e me nande si ndeher ras anak-anak tengah jabu, jembalah terus anak-anak guna banci erlajar, reh buena erlajar, reh pentarna. La terjeng erlajar ndatken ilmu tapi pe erlajar encidahken ilmu si enggo ialokenna, bas encidahkenca e me teridah jelma si enterem kreatifitasna e. Sabap enterem kalak pentar tapi la piga si beluh encidahkenca man kalak sideban. Wari enda e me wari keterampilan pemuda sedunia. I je me anak si nguda encidahken hasil karya nyata si ibahanna. Adi sibayangken cukup malem kal ate kune bas gereja silakoken si bagenda rupana. Sada wari anak-anakta kusus nampilken kerina kreatifitasna, e maka igejapkenna gereja e sekerajangenna akapna (miliknya) ialoken perpulungen e kecibalna aminna pe erbage-bage.